

SALMĀN AL-FĀRISĪ

Salmān al-Fārisī, seorang sahabat yang terkenal di dalam sejarah kebangkitan Islam, terutama dalam “Peperangan Khandaq”.
Sudut dari riwayat hidupnya yang cemerlang kita melayukan di sini dari buah pena doktor- “Ahmad Amīn” pengarang kitab “Fajr al-Islām”-P.Q.

(Oleh Doktor Ahmad Amīn)

Dalam zaman Nabi (SAW), kerajaan-kerajaan besar yang berjiran dan mempunyai perhubungan siyasah dan perniagaan dengan Semenanjung Arab ialah kerajaan-kerajaan Habshi, Rom dan Parsi. Apabila orang-orang Islam dianiyai dan disakiti oleh puak jahiliyyah maka ke negara Habsyi lah tempat mereka berhijrah, dan apakala mereka keluar bermiaga ke negeri Syam maka dengan itu berhubunglah mereka dengan Rom, dan manakala Arab Hijaz berhubung dengan arab Yaman maka berhubunglah pula mereka dengan kerajaan Kasri (Parsi). Apatah lagi Parsi pada zaman itu menaungi kerajaan “al-Munādharah” sebuah kerajaan arab kecil, dan sebuah lagi dianungi oleh Rom iaitu kerajaan “al-Ghasāsanah” (Banī Ghasan).

Yang peliknya kita dapati tiga orang sahabat Nabi yang terkenal ialah keturunan dari tiga bangsa besar yang tersebut iaitu Bilāl al-Habshī (orang Habshi), Ṣuhayb al-Rūmī (orang Rom) dan Salmān al-Fārisī (orang Parsi).

Bilal seorang budak Habshi, hitam lagi abdi yang hina tetapi ia telah beroleh kemulian besar sesudah memeluk Islam, lalu diangkat menjadi tukang bang Rasulullah (SAW) kerana suaranya yang merdu. Dengan suaranya

yang merdu itulah Bilāl pada tiap-tiap kali azan dapat mengetuk pintu hati dan membangkitkan semangat orang-orang Islam pendengaranya.

Akan Ṣuhayb al-Rūmī pula, merah menyalu kulitnya, sederhana perdiriannya, pelat-pelat Romnya masih belum hilang daripada lidahnya kerana ia telah besar panjang di tanah airnya negeri Rom. Dengan takdir Tuhan ia telah dihayutkan oleh nasib lalu tiba di Mekah dan memeluk Islam serta menjadi rakan seperjuangan Rasulullah (SAW). Akhirnya pada zaman Sayyidina ‘Umar, tatkala khalifah Islam itu tercedera (ditikam orang), maka Ṣuhayb telah diperintahkan menjadi imam sembahyang di Masjid Madinah bagi sementara.

Ada pun Salmān al-Fārisī yang menjadi maudu’ rencana ini, ia telah besar panjang di negeri Parsi, di salah sebuah qariyah dalam wilayah Asfahan. Meskipun ia tidak berpeluang melihat kebangkitan Islam di Mekah sebagaimana yang telah disaksikan oleh Bilāl dan Ṣuhayb, tetapi ia telah berjumpa dengan Nabi sesudah baginda berhijrah ke Madinah.

Ketiga-tiga sahabat tersebut masing-masing menjadi contoh kaumnya dan mengambarkan perihal bangsanya. Bilāl kuat semangat agamanya lagi lurus serta pandai bermain panah. Dalam masa permulaan Islamnya iaia telah menderita dengan pedihnya dan

telah diseksa oleh Umayyah bin Khalaf al-Jamhī. Semuanya itu disimpan oleh Bilāl di dalam hatinya, dalam Perang Badar ia telah dapat membunuh Umayyah yang kejam itu dengan anak panahnya. Demikianlah orang Habshi, lurus, kuat semangat agamanya lagi pandai bermain panah.

Suhayb pula sangat *habur* membelanjakan wangnya. Dan sangat pandai bermain panah. Ia terkenal lemah lembut orangnya, elok campuran dan ahli jenaka. Demikian tabiat orang Rom.

Sedang Salmān bersikap sufi dan zuhud sebagaimana sikap setengah orang-orang Parsi di dalam Islam.

Pendeknya Bilāl al-Habshī, Suhayb al-Rūmī dan Salmān al-Fārisī tiga sahabat Nabi terkenal di dalam Islam.

Tetapi oleh kerana kerajaan ‘Abasiyyah dipengaruhi oleh orang-orang Parsi, baik tentang pegawai-pegawai kerajaannya tentang peraturannya atau pun tentang ahli tarikhnya, dan orang-orang yang telah menyusun kitab-kitab ilmu dan sejarah dan dari orang-orang Parsi, maka mereka telah menghidangkan kepada kita gambaran yang indah bagi Salman. Sedang di antara ahli-ahli sejarah itu tidak ada orang-orang Habshi atau orang-orang Rom yang boleh menghidangkan kepada kita seperti gambaran yang tersebut bagi Bilāl dan Suhayb, dan itulah sebabnya kitab-kitab yang menceritakan perihal keduanya sangat sedikit berbanding dengan cerita perihal Salmān.

Salman dilahirkan di Asfahan dalam suatu keluarga hartawan, ayahnya seorang ketua daerah. Dari kecil Salmān terkenal bersemangat agama dan cerdas serta suka menyelidik.

Salmān telah besar panjang di atas agama Majusi tetapi setelah menggunakan awalnya maka nyatalah sesatnya lalu dia

mencari agama baharu. Ia pun memeluk agama Nasrani lalu menyelidik dengan sedalam-dalamnya akan agama ini sehingga dia belajar ke negeri Syam- tempat ketua-ketua agama Nasrani yang terkenal pada zaman itu , tetapi semuanya tidak memuaskan hatinya.

Sebaik-baik shaja Salmān mendengar seruan agama dan mendengar – nama Nabi Muḥammad maka timbulah keinginannya hendak mengadap baginda dan hendak mendengar ajarannya serta hendak menguji kebenaran dan ikhlasnya. Walaupun perjalanan terlalu jauh di antara negeri Syam dengan Madinah tempat Rasulullah (SAW) tetapi ia telah berikhtiar lalu menumpang bersama-sama sekumpulan kaum Badwi yang hendak belajar ke negeri Hijjaz, malangnya Salmān dipertengahan jalan telah dijual oleh mereka kepada Yahudi sebagai seorang hamba abdi. Berpindahlah Salāan dari seorang Yahudi kepada seorang Yahudi, akhirnya tibalah kepada seorang Yahudi dari “Banī Qurayzah” yang mendiami Madinah dan dengan itu sampailah hajat Salmān yang telah mengalami agama-agama Majusi, Nasrani dan Yahudi- lalu mengadap Nabi Muhammed sallā Allāh ‘laihi wa sallam dan setelah diujinya. Dan mengetahui kebenarannya maka Salmān pun Islamlah ditolong oleh Nabi (SAW) sehingga dia dapat menebus dirinya daripada menjadi hamba abdi.

*

(Riwayat perjuangan Salmān bersama-sama Rasulullah (SAW) akan disiarkan dalam “Qalam” yang akan datang.)

Di dalam hati ada dua ilham: Satu ilham daripada malaikat dengan menjanjikan kebaikan dan membenarkan barang yang hak, dan satu ilham lagi dari musuh (iaitu syaitan) yang menjanjikan kejahanatan dan mendustakan barang yang hak serta menegah daripada kebaikan – (maksud hadis Sharīf).